



En Ärsbli-Beenli-Hirse-Tofu-Gschnätzlets – sträng vegan,
Das schmeggt noch Hobelspöön und Karton, gmischt mit Lääbertran,
Doch uss de Räschte losst sich wunderbaar e Larve glaischtere,
Und no der Fasnacht – uffkocht – kasch di näggschte Bsuech begaischtere!

Der Otti sait zem Lotti: «En Erinnerung vo dir wott y!
Kumm stand do nääbe mii, y schiess vo uns e Selfie-Foti.»
Doch wird nyt uss däm Foti mit em Otti und sym Lotti,
Denn laider wird der Otti iiberfaare vomene Drotti!

Lueg unseri siibe Bundesrööt – e Helge wunderscheen,
Wie die verloore uff der Schwyzerkarte umme steen,
Do gseesch, wurums bim Bundesroot scho lang nimm vorwärts goot,
Dasch will der aint em andere bleed uff der Laitig stoot!

Kuum isch s Verbott ewägg, do wimmlets in der Stadt vo dääne,
Si hogge iiberaal und bättle, s het Hunderti Rumääne,
Scho kunnt e neis Verbott, do geen d Rumääne wiider hai,
Jetz bättle die uss Lieschtel z Basel wiider ganz elai!



E HAMPFLE SCHNITZELBÄNGG

Fasnacht 2022

Wegen der Pandemie waren die Schnitzelbänggler weniger aktiv und deshalb ist dieser Querschnitt-Bogen weniger umfangreich.

D Laggaffe



Transgender queer, oder intersexuell,
Jetzt ischs dr Kurt, und vorher d Isabell,
Es git Moment, do kamme das verstoh,
Wenn s mol wieder staut, vor em Dameklo.

Mir hänn mit Bitcoin, und zwor über Nacht,
Millione verdient, und ä Vermöge gmacht,
Könnte jede Daag, Lachs und Kaviar ässe,
Hätte mir das blöde, Passwort nit vergässe.

Au für Beamti, ischs nit eifach gsi,
Bis am fünfi schaffe, und erreichbar syy,
Doch kei Angst, au das isch mol vrbyy,
Und bim BAG, steggt me d'Faxgrät wieder yy.

Dr Party-Boris, hets nit so mit Moral,
Seit nit d'Wohret, und het au vyy! Skandal,
Uns isch drum klar, dä isch meh als kompetent,
Und wird au irgendwann, Raiffyise Präsident.

S Anggewegglimaitli



Der 63-jeerig Fritz,
Isch mied – do hett er e Gaischesblitz:
Uff em Amt losst är sich als Frau deklarieren,
Jetz kan är sich näggscht Joahr lo pensionieren.

D Queen hoggt syt ewig uff em Thron.
D Merkel hett ewig aagää der Doon.
Wenn D Kurz haissisch, isch s Logische draa:
Ass d Amtszyt au kurz isch – zuedäm isch s e Maa.

Achtung, Achtung, dr Strom wird knapp.
Bald stelle-si ys d'Spannig ab.
Bim Schwyzer Färnseh steert s nit gross
Die sind scho länger spannigslos.

Eb Maa mit Frau, eb Frau mit Frau
Au Maa mit Maa, das goht jetzt au,
eb Bi oder Trans, das isch einerlei,
bald gäbts scho d Eh fir ein elai

BÄFFZGI



Schnitzel-Bängg

Ych mecht's Eych zerscht saage – ohni e Wangg
mir sinn kai Schnitzelbängg me, numme no'ne Bängg
das Wort «Schnitzelbängg» muesch jetz aifach vergässe
denn d'Bäffzgi hänn in dr Quarantäne d'Schnitzel gfrässe.

Die Alte kemme wieder, au d'Gruppe ABBA isch wieder koo
und dr Gottschi vom «Wetten, dass...» isch au wieder doo
mer sinn's jo efang gweehnt, ass all dä Urzyt-Schund
im Schwiizer-Färnsee au allbott wieder kunnt.

Es koschtet Millione, aber si laischte sich's ohni z'lyege
in dr Raggeete e bitz im Wältall umme z'flyege
mir laischte uns drfir langi Färnseh-Eebe mitenand
und luege «Eisenbahnstrecken der Schweiz» im Fyhrerstand.



Letschte Jänner han ych's probiert
Und mit 5 Rappe Margge e Brief franggiert
Der Haiggi het mir, ass es längt
Sogar no vo syyne Margge gschänggt
Die uff der Poscht sin nit ganz dicht
Ha Stroofporto zahlit wäge libergwicht.

Si sääge an der Margrethestrooss
In der Dalbe goht's au scho loos
S Baudep, Sii, das isch fyr d Katz
Haut alles um am Rümeliplatz
Alles wird gfällt, me will nyt schoone
D Müllere schreyt, wo dert darf wohne
Wenn die alles roode, wien e Lawyenne
Nimm ych besser myni Granium yyne.



Liebed ihr au Graubünde?, d'Lyt sin sympathisch und sicher au gueti Christe
Es hett sich jetzt aber uusegestellt, deert oobe lääbe ganz schlimmi Rassische.

Wenn ich deert Ferie mach, teent's amme ganz unagnähm in de Ohre,
wenn e Bündner zue mir sait: «Ey, tschau, bis moore!»

Ych bi jetzt doch neu kantonale Primate-Beuffdraite – ouh, hän die Freud im Zolli,
ych tritt fir d'Rächt vo däne Tierli yy und ha d'Verantwortig – die volli!
Jetzt hett dr Grossi Root zuesätzlich – ych ha's geschter de Affe verzellt,
mir au no grad d'BVB-Verwaltig unterstellt.

Ych find Handys nützlich, tue aber im Zämmehang mit Handys nit alles preschtiere,
zem Bischpill die Velofahrer, wo bim Velo fahre mit em Handy telefoniere.
So Ain isch an mir verbyblocht, däm han y noochgrieft: «Was du verzapfsch, isch glooge».
Do luegt dä Dubel zruug, verpasst e Absätzli und isch voll uff d'Schnuure gflouge.

Y bi im Kanton Obwalde in e Baiz und ha zem Källner gsait: «Bring mer e Bierli, Alte!»
Noch em achte Bier han ych denn dr Maage-Inhalt nimm kenne bhalte.
«Y bi gege Corona g'impft» han y no kenne schreye, denn hett's mi ussghebet,
Verwacht bin ych tief immene Wald inne – gfesslet und gknebet.



35 Joor

Soll me Massge draage oder nit?
kaasch es draaie so wie s Du grad witt.
S wär vordailhaft, dien mir do saage,
wurd Martullo-Blocher wyterhii no aini draage.

Ai Joor scho isch dr Trump ewägg,
dr Bidon butz jetz däm sy Drägg.
Do maint dr Boris Johnson: «My God, crazy,
sit denn bin ich dr bleedschti Breesi.»

51, 52, -3e, -4e, -5e, 56, 57, 58, 59, 60!
Bim BAG do dien sie zelle,
sie kenne s nit, sie hän s nur welle.
Sie angaschiere, die sin jo grangg,
wäg em Zellväars jetz dr Käller Bangg.

Mir mache mit Eich jetz doo e Wett,
ihr kennet Speedy Boarding au vo Easy-Jet.
Das kennt me jetz, s kunnt nit allne glääge,
au bim FCB dangg ihrem Dääge.



Nachtschwärmer

Wott y nid haim, und wott kai Stress
Schigg y mim Schatz e SMS
D'Usreed isch albe ganz banaal
Y stegg grad fescht, im Souez-Kanal

E Bitz e Saich, us minere Sicht
Iberaal die Massgepflicht
Es waiss doch jeede, wyt und brait
Ass me nid Massge, sondern Larve sait

Ha my Leerer als zem Wahnsinn dryybe
Bi mee als aimol hogge blyybe
Hit fyyl y mi wie e Propheet
Y kenn s'ganze griechisch Alphabeet

Die Aabrennte



Syt dr Homeoffice-Devise hänn mir modisch bitz e Gnoorz,
Mit schlächtem Gwüsse sitze mir im Zoom-Meeting in Boxer-Shorts.
Über sone Fauxpas hät dr Pierin Vincenz numme glacht,
Dä het scho immer Business-Träffe ooni Hoose gmacht.

Es stoot dr No-Vax Djokovic im Euro Airport, root vor Wuet,
Är will dr Roger bsueche, well si ruehigi Art die däät iim guet.
Doch dr Zöllner schiggt en heim und meint: «Das passt jetzt leider schlächt.
Well zur Zyt do hänn bi uns Primate au kei Rächt.»

Au uns vier hänn d Freiheitstrychler sone Deppehemmli gschänggt,
Nur hänn mirs nit – well s wäri pyynlich – an die grossi Glogge ghänggt.
Leider kasch dä Huudel nit emol zum s Auto butze nää,
Well bim Ryybe köntnis plötzlich bruuni Flägge gää.

Die stolzi Leue-Määne grau, dr Gang statt mächtig mied und alt,
D Zeen sin z stumpf für Zebra-Schänggel und au d Wyybli löön iin kalt.
Ä dänggt: «Bevor mi d Geier hoole, zeig i allne myyni Klass!»
Git sich e Rugg und moderiert e letschts Mol «Wetten dass ...?»

WYYBUURE

Syt 1997



Nach em Homeoffice, goot der Andi Gen ins Fitnessstudio «Task-Force-One»
Sufft Spike-Protein, boosteret syni Musggle und schreit derbi lut «Wuhan»!!
Derno springt är in de Pooling, schwimmt Roche 10 Längi, ass es nur so duet spritze!
Dernäbe sitzt die hibscht RNA, dringgt Corona und sitzt dangg iim jetz in ere Pfitze.
Obwool sie scho yber Quarantäne isch, wirggt sie gaar Moderna und der Andi wird spitz.
Är sait zu iire: «Pharma zu mir hai, in Isolation, oh Sie mi Virus vo Bümpliz.

Won är dehei sy «Pfitzer» uspaggt, do isch es denn bassiert:
Statt mit eme haisse Zoom-Meeting wird sie mit eme Lock-Down konfrontiert.
Är schluggt Tablette vo Biontec, versuecht e Sälbschtescht und fyylt sich wien e Klon.
Sie maint «Novartis bitzli ab», doch sy Pfitzer gseet immerno us wien e Rosynli-Mutation.
Sie sch impft mit iim: «Sie mien halt nid so viel Chemie schlugge, Sie glatte Klaus!
Ich faar jetz nach Omikron zu de Zwilling Johnson&Johnson und Sie...

Blieben Sie zuhaus!!»





In der Downing Street 10, d Queen syyg betroffe, wird schyyns numme gfeschtet und ummegsoffe Jo me muesch firr dä Johnson Verständnis haa, äär macht daas, won äär halt am beschte kaa.

Dää Johnson mues, fallt miir doo yy, scho am Morge bim strääle bsoffe syy.

So e flüssige Maa, wie dää Vincenz gits niene rund um d Uur het äär syyner Bangg welle diene. Bi sym Arbetsyyfer ischs drumm au normal: Home Office Zoobe im Striptease Lokal.

Und wenn sich die Blutte denn vor iim verrängge, duet äär numme ans Wool vom Finanzblatt dängge.

Fir d Expäarte wirts e Daatsach blyybe, d Ärde isch rund und isch e kai Schyybe. Woby yich doo aber als Schwyzer bedoon: Sisich unterschiedig vo Kanton zu Kanton.

Ain vom Baselbiet däät zum Bischbill sääge, sisich glyych was stimmt, miir syy dergääge.

Jetzt muttiere Abideegge zue Poscht Filiale. Muesch Abideegger Bryyse fir d Margge zaale und hesch d Margge drnoo uffs Päggli gläbbt, gits der Poschstämpel numme mit Arztrezäpt.

Und mechtsch statt B Boscht lieber A muesch zwingend e Granggekasse haa.

Sotte sii kaini Hoor uff em Schädel haa, denn biete miir iine e Gschäftsmodell aa: lire Schädel bringt e Brofit ganz e schnälle, äär isch gsuecht als Standort firr Fotozälle.

D Frau Sommaruga isch au intressiert, sii het schyyns der Berset engagiert.

SCHNAABELWETZER



Hallo, wo bisch? Y bi jo doo! Und loosisch mir au zue? Esoo könnt s dööne, gosch go ässe in dr Blinde Kueh. De gseehsch dy nit und ghöorsch dy schlächt – und was isch d Konsequänz? Für das muesch nit in d Bäiz – do längt e Video-Konferenz.

Das isch dr Hanspi: Isch är trans-bi oder äifach bi? Zum trans villicht no hetero – jä, könnt s au umkehrt syy? Trans-hetero-bi-sexuell – s Problem isch lengscht verbyy: Hüt wird me nur no gfroggt: Hänn Sii s Zertifikat drbyy?

Es ghöört efang zum guete Doon bi Multimilliardää: Me fliegt ins All, das koscht jo nüt und isch au gar nit schwäär. Es isch soo gäil und exklusiv und macht sy alli froh: Vo uns uss hätt me die au grad dort oobe könne loo.

Käi Wunder het em Boris syyni Fryyse gar käi Schnitt. Bi soo vyyll illegaale Partys wund'ret uns das nit. Politisch voll zerzaust – k.o., dä Ober-Party-Klaus! Hätt dä nur uff dr Berset gloost: Und bleiben Sy zu'aus!



D EU het Atomstrom neu für noochhaltig erklärt, Dr Strom isch zwar dr Glyych, nur isch är so jetzt vyyll meh wärt, Für Details lauft e Studie, drum wartet mit Kritik, Bis jetzt könn me erscht sage, ass dr Müll noochhaltig syg.

D Zahlige vom Grosi wärde ständig retourniert, Drum han ich re e Tip gä, wie das küntig nümme passiert, «Chaafl nid druff umme, wenn d nid wirklich sicher bisch, Obs e QR-Code ode e Krützworträtsel isch!»

Ich hane Studie glääse, leider isch s uf Änglisch gsi. Zum Glück het ain uf Facebook s Wichtigschd zämmefasst für mi. Ich weiss jetzt gnau, wie me sich vor däm Virus schütze kaa: De muesch nid impfe – nei – de bruuchs e Glogge vornedraa!

FÄÄRIMAA



25 Joor

Es isch gaga, gege G G G sy – und es bringt jo nüt hingege gege G G G sinn sehr vyyll Lütt wär wäge GGG gaga wird, shtoot im Schilf und gege gaga syy isch G G G kai Hilf

D Poscht schliesst Filiale – das duet weh Haltstelle stryyche d BVB das bedütet, so wie die Basel zämmestuuche dass mir für e Lockdown gar kai Virus bruuche

Während de Bauarbaite in dr Freie Strooss, dief unde hett e Bauarbaite e römischy Münze gfunde das bedütet, es hett also bereits zu säller Epoche so Bange gää wie d Credit Suisse – wo s Gäld verloche



Y sag mym Augenaarzt, y bruch e steerggeri Brülle In dr Hoffnig, dass är das Wünschli ka erfülle Die letschte Gleeser mit so 'mne Schliiff, sait dä verdrosse haig me als NASA Teleskoop in Wältruum gschosse Rächt verlöcheret hänn sy s Miss Maarpeli, my Schweschter Die hett my z Basel bsuecht, sy woont sunscht in Mancheschter Jeede Daag, us lutter Gwoonet, sälbschtvergässe isch die in Doppeldegger Impfbus yynegsässe



35 Joor

Gly sin unseri Buure alli stier, au d Ställ verschwinde samt dä Tier, me isst Vegi Flaisch oder Vegani Eier, und dr zue e feine Rote Labor-Zweier.

My Bueb frait sich jedesmool uf s Teschte, bim ins Gleesli spugge gheert är zue dä Beschte, wenn är so wyter spuggt, isch s völlig glaar, denn wird är emool e Fuessballstaar.

Isch s nit scheen wenn e gstandene Maa, wie dr Laschet, so härzhaft lache kaa, bi dr Wahl hebt em aber kaine d Stange, drum isch em s lache schnäll vergange.

Me macht kai Raucher-Wärbig mee, in dä Print-Medie see, drfir wirtsch bombardiert, s isch verruggt, mit Reklame vo kinschtliche Flaischbroduggt.

40 Joor

DIPFLISCHYSSE



Muess bi de Junge ebbis laufe
dien sie Ballön mit Lachgas kaufe
mir suffe amme e Grappa oder zwai
denn kunnt dr Ballon vo ganz elai

Bim Schwizer Färnseh ischs eso
wär no laufe ka, dä laufft dervo
dr Letscht lescht s Liecht, ihr wärdets seh
sich dr Bettware Fischer vom Zirisee

Bi dr Raiffysee Bangg hett dä Maa
syni Nase iberall dinne gha
aber d Spese vom Vincenz ditte druff hi
im Rotlicht ischs nit numme d Nase gsi

Helene Fischer sag uns gschwind
wie kunnsch denn du zu mene Kind
ganz aifach, achtung fertig los
und denn e Nacht lang atemlos

Fahrsch eleggtrisch denn hesch Gligg
kasch gratis tangge das isch digg
de froogsch di sicher wie das goot
aifach warte bis dr Blitz yschloot

In Australie froggt ain was er mache soll
er haig e ungspritzte Serb am Zoll
bim teschte haig me zwische de Ohre
Im grosse Hohlraum s Stäbli verlore



Blageèri



Ob Koks ob Gras oder Extasy
Dä Saich wärf sie die Junge ii
Und s'diggtschte isch do muesch loose
Wäge Impfige hän sie dr Gagg in de Hoose

D'Abfuhr und d'Schugger sin elektrifiziert
Bi dr FÜRwehr wirts als nägchts probiert
Im Roothuus dien si jetzte Stromkaabel verlegge
Zum Awäsendi usem Dornröslischloof wegge

Fyr d' Affe im Zolli bruchts schintz Menscherächt
Mir wisse nitt isch das guet oder schlächt
Aigentlig sette si die Rächt bikoo
Im Roothuss hogge Esel und die hänn si schoo

E Fasnacht im Summer hett Vorteil das muesch see
Machschr Cortége in dr Badi nit im Schnee
Anstattg Mählsuppe löffle losch di mit Sangria volllaufe
Und wills Koschtym nimmi passt muesch nur e Badhoose kaufe

FAMILIE M. STEINER



Dr Babbe goot jetzt als Option
zum Jasse grad in d Teschtstation
bim Sprütze denn dr groossi Schogg
wo d Ärztin ihm seit «Gstoche Bock!»

Shaqiri dasch für di kei Seich
fliegsch jetzt über dr grooss Deich
näåbe groosse Disney Schlösser
isch dort au di Bänggli gröösser

D Helene Fischer griegd e Kind
in Uri knallt im Böög si Grind
do git s ei gmeinsamkeit dasch richtig
beides isch nit wirgglig wichtig

Frau Länzli



Sin Sii sicher, dass Sii das au sin, grad wo Sii sin?
Will wenn Sii das net sin, so wie Sii sin, machts wenig Sinn
Fir mii isch s philosophisch wichtig, drum blib ich no draa
Und tritt do als Frau Länzli uff, und sicher net als Maa.

Bim Wettbewärb vom Fust, do hani dänggd, wow isch das gspunne.
Hani doch dr 1. Priis, e Wäschmaschine gwunne
I ha se gfüllt und s Gnepfli druggd, woni denn grad flip.
Will uf dr Aazaig stoot: Es tut mir laid, mir fehlt der Chip.

s Kuchi-Daaberettli



Klima-Aktivischte hänn letschti z' Bärn vorem Parlamant
Mit Sekundeklääber ihri Händ fescht kläbbt an de Wänd
Dummerwys sig denn vermuettlig bitz Lyyem ab ihre Pforte
Au no uff e Sässel vom Bundesroot Ueli Muurer groote.

My Frau und ich sinn letscht Summer haimlig und verstohle
vo Abideeg zu Abideeg go Gratis-Corona-Sälbttescht hole.
Mer hänn ghamtschteret, hänn se zwar nie miesse benutze,
Aber die Wattestäbli sinn ideal, zem d PC-Taschte z' butze!

My Gettibueb schafft inere Bangg, duet im Nohwuggs kicke,
Isch in der Kirche Ministrant und Damburmajör inere Clique,
Duet ime dyre Nachtclub serviere und – dasch s Famoose –
Drajt fir daas alles rund um d Uhr immer syni Trainerhoose.

Homeoffice isch «in», drotzdäm duet d Roche jetzt blaane,
Nääbem zwaite Durm miess dringend au no e dritte aane!
Nid wäg' meh Arbeitsplätz, sondern zem dermit z' blaagiere
Und bim näggschte Jubileum in 3-D druf kenne z' projiziere.

My Huusarzt het in my Impfuuswys gluegt und gschimpft.
Denn het er my gege Diphterie, Zägge und Grippe gimpt.
Ha mi drey mool gege Corona lo pikse, ohni lang z' warte;
Und esoo ka-n-y jetzt voll als «Impf-Fluencer» durestarte!



Am Fäärnsee hänn uns d Ninja Warriors vellig fasziniert.
Säggs Meened hän mir jeede Daag an Hindernis trainiert.
Yber Gräåbe springe, es sichers Glyychgwicht gwinne,
mit Barriere ringe, durch ängi Röhre dringe,
em Wasserloch entrinne, ans anderi Ändi schwinge,
d Bai um Pföschte schlinge, bis d Ängeli gheersch singe.
Nur so kasch du in drei Minute d Freie Strooss bezwinge.

Mit 3G deerfsch bi uns normaal in de Baize mampfe.
Mit 2G plus deerfsch Fitness mache und in Clubs go dampfe.
1G isch dr neuschti Hit. Hey, wie isch das toll!
Und mit 0G kunnsch immerhin z Auschtraalie bis an Zoll!

Zem Schaffe näme mir dr Bus, das isch is gar nit z vyyl.
Und d Feerie mache mir deheim, das hillft em Klimaziel.
Dass mir so CO2 dien spaare, isch doch seer z begriessie.
En aarme Miliardäär kaa sich derfir in Wältrum schiessie!

D Skandâalnûdle

LGBTQI isch in
Und wie Diir gseen sin mir zमित dinn
Fiir Glyychbehandlig wird votiert
Und d AHV het reüssiert
Ob glai grooss digg arm oder ryych
Jä sii behandellet alli glyych
Ob Maa ob Transe oder Frau
Bald griegt kai Sau me AHV

**Ob Männli Wyybli kunterbunt
Miir lieben alles was so kunnt**



S isch klaar wenn me dr Biden kennt
Dass me iin Sleepy Joe au nennt
Doch s isch soo dass au Vordail het
Dass äär e bitzli staggelet
Fiir d Schwyz isch es jo durchuus guet
Wenn äär sich d Woort zrächtleege duet
Und sich vyyl Zyt bim Reede loot
Well s so dr Muurer au verstoot

**Und wenn dr Muurer d Oore spitzt
Denn mainsch dass deert e Hobbit sitzt**

Wiggelfisch



Angela, oh Angela
Hänn mir mit dir Komeedi gha
Und mit em Scholz goots wyter so
Wieso hänn si kain uss Öschtryych gno

D'Schwyz losst in dr Präss verlutte
S'libürgere goot numme'n no fünf Minute
Wenn's fertig isch, dailt me no mit
Wie's am schnällschte IV git

Y mach e Abgang, jetz isch gnue
Gang hinde uuse, schloo Düüre zue
No due'n y «deubele», numme'n e bizz
Sali zämme – Djokovic



Schyynhailig

dank dr Ehe für ally – dasch gar nid so schlächt
bykômme d Prymaate jetz doch d Menscherächt

Es bhaltet d Martullo e Masgge im Gsicht
ych find vor däm Hintergrund ghört das zur Pflicht

es duet sich d Rassismusfroog hüt jo scho stelle
wenn e Schwarze e gsprützte Wysse wott bstelle

Falls dr Ängelbärger in Bundesroot kunnt
lääbe d Lüt ainsam und stärke nur gsund

Lüt wo dr Buuster dobblet wänn nütze
lööen en sich dirägg in d Lippe lo sprütze

Es herrscht an dr Fasnacht die rain Anarchyy
nur wenn sy verbotte wird löön mr sy syy



GIFTSPRITZI



Nach zwei Joor, ych find das glatt
Findet ändligg wieder e Fasnacht statt!
Schränze, pfyffe und: gottsaidangg!
Wieder Publikum fir dr Schnitzelbangg
Doch s Allerbescht find ych doo draa:
S kunnt kai Äxtrazuug uss Ziiri aa!

E Hygienemasgge Typ 2 und resischtänt
Dryyber e FFP-3, ganz konsequänt
Nitril-Händschli: blau und puuderfrey
E Schutazuug und Desinfeggtoon als Spray
Jetz no d Schutzbrille uff und denn ratzfatz
Daarf dr Djokovic wieder uff e Tennis-Blatz!

Lueg, wie dä Odermatt ooben aabe gracht
Und elegant drbyy no Böögli macht
Ouw: yyghänggt – nei, är isch no doo!
Suuber het dä d Kante gnoot!
Also dä Odermatt isch sauguet zwääg
... ych main dr Karli uff em Haimewääg!

S verwitscht mi d Frau – es isch e Quaal
In dr Wääbergass im ne Striplotaal
Si schreyt mi aa, s git Ranzeschnitte
Lägg, was het au die äggscht g'ritte?
Ych ha doch numme in däm Fuudischuppe
Welle e Konto eröffne bi dr Raiffyyse-Gruppe!



Schooffsuuri



D Boscht leert d Brieffkäschte hit soozsaage nie
Und ainewääg zaalsch mee – mit däm haan i Mie
S'isch fascht wie bim Wyy – und das find y so fyys:
Je lenger s Zyyg ligt – deschto heecher der Bryys.

Schwyyngs luegt bim Metzger kuum aine aa
Das fättige Flaisch das will jo kaine haa
Doch jetz wo me Schwyynshääz au yypflanze kaa
Will jeede e Sauhääz uf Resärve haa.

Was Europa betrifft – het Bäärn e Brobleem,
Me schnuert nur drum umme und waartet bequem.
Mir boschte im Elsass – ässe z Dytschland exquisit
Mir sinn scho «Europa» und bruuche die nit.

Die Penetrante



25 Joor

Der glaini Fritzli – Sii das isch e bitz e Schlimme
Sait, weeles Gschlächter haig, das miess äär no bestimme
Noo n em Duurne isch äär uss der Halle ghuscht
Und het teschtwyyss scho mol mit de Maitli duscht

Fascht jeede Oobe gseesch der Berset uff em Screen
Adrette Aazuug, frisch poliert und total cleen
Äär sait, «die Maske, eine Art Versicherung
Isch empfehle sie auch für den Seitensprung»

Der Cassis isch e Doggter, ain im wisse Kittel
Au der Berset drait, näbscht Glatze, so ne Titel

D Frau Amherd isch lic.iur und Notar grad au
Au d Käller Sutter het studiert, was weiss kai Sau

D Sommaruga mit Konzärtdiplom spiilt Dur
Sogar der Parmelin isch diplomierte Buur
und au der Ueli, bishär ooni Prädikat
het dangg Corona jetzt au e Zertifikat

Luuszäpfe



Liebi Gescht und Geschtinne – es isch kompliziert.
Mir hänn als Bänggler/Bängglerinne alles ussbrobiert.
Zum tschendergrächti Sprooch yfyere, doch – wär hätt das danggt:
Jetz het's uss Blatzgründ laider nümme für e Pointe glänggt!

Wotsch uff d'Bangg go Gäld abheebe, muesch an Automat.
Dört gits nur grossi Nöötli – ich find das desolaat.
Drum wärde Banggomaate gspräng, si lööhns richtig grache
D'Ganoove wänn dört eifach numme sälber Glaigäld mache!

De Maitlibai bim Sutter Begg dörsch esoo nümme saage.
«S het immer fuuli Sprüch gee!» hörsch d'Verkäuferinne klaage.
Ich kauf dört yy – scho schreyt mi aini aa mit bösem Bligg:
ha nur gsait: «Ihri Schänggeli sinn z'fettig und vill z'digg!»

D'Armee het dr F35 richtig ussbrobiert,
zum luege ob die Taarnkappe wirgglig fungtioniert.
Doch dr Pilot rief uff em Flugblatz uss, und das syt Stunde,
Är het s'parkierte Flugli noo dr Pause nümme gfunde.



Bebbi-Buebe



E Schugger fluecht – jetzt hesch dr Drägg
Dä Tesla kunnt jo nid vom Flägg
Do z Basel wott me – s macht mi schyssy
iiberal nur Tempo dryssy
Dr Raiber ka so, ganz verstoole
Mit em Velo iiberhoole

D Boscht, jä die isch unter Drugg
D Briefboscht goot gewaltig zrug
Spaare sott me wie no nie
Doch weiss me gaar nid wo und wie
Mii hätte e Tip wie d Boscht kennt briliere
Sälber bringe und zwei mool frangiere

D Emigrante



Si trychle lut und mache Buff,
Gän für d Freiheit niemools uff.
S Virus grinst nur fies drzue,
Schällt s Dooteglöggli – scho wird Rueh.

*Lueg emol dört und lueg emol do,
Viil Freiheit birgt au Risiko*

Hii und häär mit ganz viil Drugg,
Är schloot uff – und sie schlöön zrug.
Bi däm Spiel, es isch «No Wonder»
Gohd dr Djokovic «Down Under».

*Lueg emol dört und lueg emol do,
Regle sottscht halt zerscht verstoo*

Em Fritz si Karre isch ä fette,
Faart mit Strom zum s Klima rette!
Wotsch e soone Schlitte hoole,
Bruuchts zerscht mol e Hufte Koole

*Lueg emol dört und lueg emol do,
Raggeete startisch au eso*

Läckerli Huus

BASLER ORIGINAL



Dr Insle Boris uss dr Gosse,
het Corona-Partys gnosse.
Halb tot duet äär denn ummeschlyche,
mainsch äär sig e Corona Lyyche.
Hät dr Berset soone Hoorpracht aa,
no häätte mir letscht Joor Fasnacht ghaa.

Mit däm Drämmli vo dr BVB,
wo unser Roger druff kasch gsee.
Kasch gränzelos uff Weil go ryyte
und Yyykäuf d Saint Louis bestritte.
Das Drämmli könt, es isch e klaare,
sicher uff Australie faare.

Glyychstellig isch sehr aggtuell,
zwüsche Frau und Weissnit sexuell.
E Damevelo muess uffs Schild
und oohni Ständer uff em Bild.
Doch am Ändi dien die Gritte,
yyber d Köörbligröosi stritte.



Heiri

Comité - Bangg



Us me alte Mäihdröschler han ych e nöii Maschine bout.
Mit dere ruum y z Baasel uf, gäll das hätt sch mr nid zuetrou!
My Maschiine isch genial! Dä Helge zäigt e Foti.
Sy verschrottet im Minutetakt 10 Elektrotrotti.

In de Schuele häi sy hüt e richtigs Säichproblem.
Buebe oder Mäitli-WC? Die Froog isch unbequem.
Myni Chüeh mache käi Theater, y muess käi nöii Hüüsli chaufe.
Die mache s wie dr Bundesroot: Sy löie s äifach laufe.

S Veterinäaramt het mr gschriibe, y sell my drvoor hiete,
myni schööne, grosse Glogge de Freihäitstrychler z vermiete.
Sy häige uusegfunde, drum syg s wichtig, dass me mahn:
Uf de Glooge häigi s noch em Trychle Spuure vo Rinderwahn.

S Groosi schimpft: Dä Herr Vincenz mit syne Stripper*inne.
Daas isch nüt Nöis, dasch doch normaal, solange y mii mag bsinne.
Immer wenn ych uf d Bank muess, s Gäld isch hüffig knapp,
denn ziehie mr die Halungge s letschte Hemmli ab.

GASLADARNE



45 Joor



Es git e neyyi Margge bi der Schwyzer Boscht,
wo nur 5 Rabbe, also kuum no ebbis koscht.
Worum das isch, das het men uns esoo ergläart:
Meh isch dä Service vo der Boscht jo au nimm wärt!

E sone Tenniskarriere die isch toll.
Do froggt der Roger was är nochär mache soll?
Was Du au mache wotsch, es wird Dir sicher glinge.
Aber syg so guet, verschoon ys mit em Singe!

Als letschte Bundespreesi het der Parmelää
In däre schwääre Zyt immer s Beschte gää.
Und in däm Joor isch der Cassis an der Raie.
Me kas verglyche vonere Torte zuenere Waie.

Bime Staatsempfang ghesch d'Queen galant mit Huet
und em Charles stehn syni Uniforme guet.
Nur mir Schwyzer sinn halt modisch schyter draa,
denn der Murer zieht nur Trychler-T-Shirts aa.

Vor der Landeshymne sait der Shaq zem Xhaka:
Ych sing nit mit, well ych dä Täggscht jo nit verstoo kaa.
Und zuedäm, isch lut BAG denn iberhaupt,
's Singe ime glaine Chor wider erlaubt?

Hansli Bargäld



Ich schaff im Gsundhaitswäse,
Syt nejschdem jetzt in Bärn.
Die sueche Lyt mit Hirni,
drum nämme si mi gärn.
d'Verantwortig isch gwalltig,
drum gits e digge Lohn,
Ich kreier die neje Nämme,
vo jedre Virusmutation.

Dr Pianischt LANG-LANG,
dä spielt Klavier scho lang.
Im Gegesatz dr KURZ,
spielt Kanzler numme kurz.
Ob länger oder kürzer,
mängmool isch's äifach z'spoot
doch wärs e Liechtblig fir ys alli,
ween denn dr Putin ändlig got!

E Lehrer us em Bläsi,
git Gschicht in dr C 3.
Är froggt dr döösend Kevin,
kennsch Du dr Galilei?
Ich kenn dä, sait dr Kevin,
mit Nämme bini guet.
I kan ene au sage,
wo dä jetzete schutte duet.



Do het mir Ain, in d'Waade bisse
My Maad het lhn denn, vo mir grisse
No maint dä drogge, in sym Waan
«Ich läbb syt 14 daag Vegaan»

Mir hän no e froog, e weeneli doof
wenn jetz e glaine, vegaaner Goof
nimm am Nuggi, duet suggele
darf dä denn, am Duume nuggel?